

14. april

Ilinniagaqarnersiutit pillugit Inatsisartut inatsisaata allanngortinneqarneranik nr. Xx af xx xx 2016-imeersoq.

(Ilinniartitaanermut, Kultureqarnermut, Ilisimatusarnermut ilageeqarnermullu Naalakkersuisoq)

Ilinniagaqarnersiutit pillugit Inatsisartut inatsisaata allanngortinneqarnissaannik Inatsisartut inatsisissaattut Naalakkersuisut saqqummiussaannut ima Siumumiit oqaaseqassaagut.

Ilinniagaqarnermusiat iluanni iluarsartuussineq saqqummiunneqarpoq, tassungalu tunngavilersuutigineqartut qularnangilaq tamatta assigiinngitsunik isummersorfigissagipput.

Siullermik ullumikkut naak ilinniartitaanerup oqaluttuassartaa Nunatsinni suli nutaraagaluaqisoq angusarineqarsimasut nuannaarutissaasut annertuut aamma qiviartarnissaannut immitsinnut periarfissittarnissarput pingaaruteqartoq. Nunanut siuarsimasunut immitsinnut sanilliutissagutta angusavut piffissamut atorneqartumut qaffasipput, naak amerlanerpaatigut ilinniagaqarsimassutsip iluani ilaqutariinni kingumut qiviarluni kinguaariit aappaanut amerlanertigut aatsaat killiffeqartugut. Tamannali paasineqassanngilaq sutigut tamatigut pitsanngorsaajuartariaqarnerput tassunga killiffeqassasoq. Ilinniarsimassutsip inuup atugarissaarluni inooqataasinnaanera pitsaasumik toqqammavisittarppaa, tamannalu imminut naleqarnerulersinneruvoq naleqangaartoq.

Nalunngilarput ilinniartitaanerup iluani unammilligassavut imaannaangitsuusut, soorlu aamma meeqqat atuarfianni tamanna takussutissaasoq, ilinniartitaanerup iluani aaqqissuussineq tamatigut tamakkiisumik isiginnittaaseqarluni aaqqissuussiffiusariaqarnera tamatigut nalilersuinerni toqqammaviusariaqartut isumaqarpugut.

Inatsisissami tunngavilersuutigineqarpoq ilinniarnermut kajumissuseqarnerulluni aallussinissamut ilinniakkamik naammassinnipallartarnissaq siunertarineqartoq. Piginnaasat nunatsinni pigisavut tamaasa inissaqartillugit ingerlassagutta atuagarsornerup iluani kikkulluunniit piginnaasaminnik qaffassaarusullutik ineriartorusuttut tikilluaqqullugit.

Pisinnaartitaaffiit pisussaaffinnik malitseqartuarneri pisortat tungaanniit oqariartuutiginiarneqarmata, isumaqarpugut aamma pissusissamisoortoq ilinniartut inersimasut tamarmik atugassarititaat assigiikkannersumik inissisimanissaat pissusissamisoortoq. Taamaammat qanoq sukkatigisumik naammassisimaneq tunngavigalugu assigiinngiaartumik ilinniarnernup nalaani attartorsimasat akilersornissaannut pisortaniit tapiiffigineqarsinnaalernissaannik isuma siunnersuutigineqartoq, isumaqarpugut ataatsimiititaliami nalilersorluarneqartariaqartoq inaarutaasumik isummerfigineqannginnerani.

Aamma isumaqarpugut ilinniartunut attartortittakkat attartortitsinermiit ingerlaannaq ernialersorneqarnissaannik siunnersuut ataatsimiititaliami nalilersoqqissaartariaqartoq – tamannami, erniat allanngorarsinnaaneri aamma eqqarsaatigalugit, malunnaateqartumik ilinniartunut naammassereernerup kingorna aningaasartuuteqarnerunissamik nassataqartitsisinnaammat, soorlu aamma tusarniaanermi Kalaallit Danmarkimi Ilinniagaqartut Kattuffiata taamak oqariartuuteqartoq.

Inuiaqatigiinni sumiikkaluartuniluunniit ilinniarneq siunissamut aningaasaliineruvoq, taamaattumillu ilinniarnermut ilinniaqqinnermullu kikkut tamarmik periarfissaqartuarnissaat anguniartariaqartoq

Siumumiit isumaqarpugut. Aamma soorunami tamatta isumaqatiginartitaraarput, ilinniartut sapinngisamik amerlanerpaat, piffissaq sivikinnerpaaq atorlugu, naammassisarnissaat pisinnaappat tamanna assut iluarinassasoq. Taamaattorli aamma ilisimavarput pissutsit assigiinngitsorpassuit tunngavigalugit ilinniakkaminnik naammassinnittartut ingerlarsorsinnaanerit assigiinngissinnaasartuq, tamatumani Siumumiit pingaartitaraarput assigiinngisitsivallaarani aqqissuussinerit iluseqartinneqarnissaat.

Taamaammatt Siumumiit qilanaaraarput partiit allat peqatigalugit Naalackersuisuniit siunnersuutigineqartoq manna ataatsimiititaliami aappassaaneqannginnerani suliareqqinnissaanut.

Vivian Motzfeldt

Siumut